

四庫全書

集部

欽定四庫全書

集部
全室外集卷三

詳校官編修臣翟槐

中書臣劉源溥覆勘

總校官庶吉士臣何思鈞

校對官中書臣嵇承志

謄錄監生臣蔣錦城

欽定四庫全書

集部六

全室外集

別集類五
明

提要

臣等謹案全室外集九卷續集一卷明僧宗泐撰宗泐字季潭臨安人洪武初舉高行沙門命往天界寺尋往西域求遺經還授左善世太祖欲授以官固辭太祖為撰免官說其後胡惟庸謀逆詞連宗泐特原之是編題曰

外集蓋釋氏以佛經為內學故以詩文為外
猶宋釋道璨柳塘外集例也首二卷為應制
詩及樂府供佛讚佛諸曲三卷至八卷為古
近體詩九卷為疏及題跋續集詩文合編而
詩文之間闕四頁其原數遂不可考今所存
者凡詩三十六首題跋十五篇千頃堂書目
作全室外集十卷蓋合此一卷言之耳宗泐
雖託跡緇流而篤好儒術故其詩風骨高騫

可抗行於作者之間徐一夔作是集序稱其
如霜晨老鶴聲聞九臯清廟朱絃曲終三歎
彷彿近之皎然齊已固未易言要不在契嵩
忠洪下與句曲外史張羽均元明之際方外
之秀山者也千頃堂書目載宗泐尚有西游
集一卷蓋奉使求經時道路往還所作見聞
既異其記載必有可觀今未見其本存佚殆
不可知矣徐補卿翦勝野聞謂宗泐奉使西

域未至其地塗遇神僧幻化而歸者蓋未知
宗泐有此集故造是齊東之語與所謂宗泐
蓄髮還俗同一謬妄也乾隆四十三年九月

恭校上

總纂官臣紀昀 臣陸錫熊 臣孫士毅

總校官 臣陸費墀

全室外集原序

昔者文物之盛士有高世之志託迹桑門者既有得於其宗而亦以操觚染翰為事以與海內作者齊驅並駕使其教益大以顯有若天台季潭泐公者焉初公負聰明特達之資既釋士服翱翔大方擇所依歸之地時廣智禪師訢公學貫儒墨肆筆於文事卓然成一家言施之著作之廷而無媿天歷至順間光膺帝眷說法金陵官寺縑素向往得其片言隻字以為秘寶馳騁出入以

應其請如羣飲于河各滿所欲聲譽赫然泐公既自得
師當是之時金陵亦東南都會內而臺閣名流外而山
林遺老至其地者莫不折節而與廣智交泐公叅請之
餘又得博其聞見九六籍之所存百氏之所稱名家巨
集之錄日務記覽涵揉停蓄而後吐出其胸中之奇譬
之築九仞之臺其基既厚何患其不崇且大也故公學
甚辯博才甚瓌偉識甚超邁而皆發於聲詩其詩不論
於空寂推敘功德則發揚蹈厲可以薦郊廟褒贊節義

則感慨激烈可以厲風俗至於緣情指事在江湖則其
言蕭散悠遠適行住坐卧之情在山林則其言幽夤簡
澹得風泉雲月之趣在殊方異域則其言慨而不激直
而不肆而極山川之險易風俗之媿惡其詩衆體畢具
一句一字滌去凡情俗韻一趣乎雅有一唱三歎之意
焉故其大篇短章之出四方萬里爭相傳誦震耀耳目
皆曰泐公猶廣智也余與公同里閭及壯而游又託方
外之好公軀幹魁碩音吐洪暢其與人交也意度豁如

望之者知為法門偉器初出世李白題詩之寺值天下
亂入山益深入林益密以養其高會大明混一肇隆像
教之事今京師第一禪林即廣智說法之地桑門上首
非有宿德重望為上所知者不以授之公以廣智大弟
子繼席據猊座揮塵之日四衆雲會莫不榮之而公處
之不以為泰佛有遺書在西域中印土有旨命公往取
既銜命而西出沒無人之境往返數萬里五年而還艱
難險阻備嘗之矣而公處之不以為戚定力所至出乎

世相之表夫豈庸流之所能窺哉若其見諸語言文字則又特其寓者耳公之從子永祚得公詩法之傳既彙粹其所為古樂府歌行五七言近體為若干卷公別號全室因總題曰全室集以集示余意欲得余言以引其首者嗚呼廣智之集虞文靖公序之謂如洞庭之野衆樂並作鏗轟軒昂蛟龍起躍物恠屏走沉冥發興至於名教節義則感激奮厲老於文學者不能過天下以為知言有如余之昏鄙庸陋得而觀之如以賤目而窺羣

王之府但駭其光采之粲爛而莫能枚指其名也惡足
以言之哉余不敢拂其從子之意因以區區之見彷彿
其槩若論其至則必有能言之士如虞公者為之言也

同郡徐一夔序

欽定四庫全書

全室外集卷一

明 釋宗泐 撰

欽和御製暑月民勞律詩一首

田夫豈暇納微涼
赤日流金數畝秧
自是吾皇能體物
極知黎庶有飢腸
萬家共仰秋成富
百世先培國本強
白首方袍無用客
獨於林下和宸章

欽和御製思親懷古律詩二首

玄堂冬日尚玄衣獨有思親外萬幾虞帝泣天當雪鬢
漢皇歸沛度河磯中都勝地疎遊幸大孝終身靡間違
天下蒼生欽聖化老臣寧不念庭闈

海內承平有底愁皇陵松栢老園丘滁山南去關門壯
淮水西來郭外流轉眼光陰三十載興王事業百千秋
中都父老頭如雪長望龍輿此地遊

欽和御製大將征回朔漠空虛二首

萬姓謳歌朔漠清都緣聖主有經營北邊自古存甌脫

瀚海于今屬大明鴻鴈三秋隨入塞風雲萬里擁歸旌
漢家曾奏無人曲未若天朝此一征

百萬旌旗蔽野陰聯翩戈甲耀南金一朝白草無秋牧
千里黑松空舊林追敵不知飛騎遠下營俄見湧泉深
將軍功業過前代刺石天山第幾岑

欽和御製江東橋詩

玉作闌干石作梁銀河清夜共輝光經營自出天工妙
鏤琢仍歸匠者良大駕親臨觀氣象羣臣載拜獻詞章

誰知千古不磨跡地久天長轉更彰

石梁高架奠長江要路通津揔帝鄉一代規模天廣大
萬年功業日昭彰吾皇製作親曾賜臣下賡歌孰敢當
聖子神孫承大統願言鴻祚永延昌

欽和御製山居詩賜靈谷寺住持

松風蘿月滿禪房物外高情孰可當鳥為銜花渾不恐
兔因暖足自相忘峯巒重繞何深邃樓閣新開更煒煌
勅賜良田供萬衲不須日糴太倉糧

城外重岡一逕微中開寶刹獨巍巍松根燕坐雲生石
廡下經行月到扉問答箭鋒能破的嘖呻師子不藏威
幾多不解知端的水潦鶴云諸佛機

紺宮勝槩自天工大士中居鏡作容松頂月來多伴鶴
巖前雲起忽從龍奎文勝似珠千斛寵賜過於粟萬鍾
僧遠不知天仗到時人錯道有高風

刹幢高出衆峰巔禪者家風靜處便世上塵埃千市合
谷中花木四時鮮幽深共仰慈光溥愚懦咸資化力全

為報學流心是佛著鞭當在祖生先

山林麋鹿性相便稱意何須負郭田掛樹獼猴常近席
散花仙侶不離筵半窻梅月清宵夢一榻松風白晝禪
慧約草堂渾忘却獨於相府住多年

鐵錫初將壁上懸聖恩容我此安禪曉看草木霑多露
夜睡星河近九天石與道心無動日樹同僧腦不知年
請看八德池中水一洗勞生累劫愆

誰識千峰頂上幽羚羊挂角沒踪由談玄自折松為拂

遇困聊將石枕頭寒谷花開多向日空巖葉落始知秋
莫言與世相疎甚此是山居道者流

偶向溪頭坐石磯水禽沙鳥自相依敢言有道忘入境
祇欲無心契祖機莎草似茵迎日軟荻芽如玉到春肥
巖扉半掩歸來後步履修廊月色微

新到山居興趣多松門盡日客稀過經行偶見巖花落
睡起忽聞山鳥歌捷徑固非今世有移文爭奈昔人何
老來已得安心法一念纔生即是魔

開善堂前長綠蘿欲探遺跡興蹉跎一千年事猶堪舉
十二時辰尚可歌送供天人曾雜沓分身街市自婆娑
今朝寶塔移東嶺更覺山林氣槩多

通玄有路好追遊須踏毘盧頂上頭薦福古公言莫莫
桐城投子道油油溟濤終見鷗鵬化枳棘徒聞鳥雀啾
一墮聲塵忘歸客寒巖虛坐幾春秋

欽和御賜詩一首

奉詔歸來第一禪禮官引拜玉階前恩光更覺今朝重

聖量都忘舊日愆
鳳閣鐘聲催曉旭
龍池柳色弄晴烟
有懷報效慙無地
智水頻澆道種田

欽和御賜詩廿字

宮殿雲霄近山林雨露深
九重明主意一寸老臣心

欽和御賜淮遊行

初作淮南賓空山隔蹄輪
烟霞淡為侶水石清相親
結茅有餘地風雪忘苦辛
或來野人服亦有居士巾
饋糧稍相繼修忽踰三春
雨露滋萬景巖壑容此身
常欲息

諸見以之空六塵種蓮一池小引泉清澗濱丹書俄遠
召殊恩異兩人再瞻鴛鴦序永辭麋鹿隣不願東歸越
不願西入秦但願居轂下終身荷皇仁大哉乾坤內何
物非陶鈞

欽和御賜詩

天街春曉踏微霜觀闕峩峩首屢昂品彙摠承陽氣早
賡歌敢頌聖躬康御溝綠轉千條柳齋室烟浮百和香
有道年年登黍稷歲星不獨在金穰

欽和御賜復住持善世新寺詩一首

松下閒居幾度秋，燈前顧影獨無儔。
遣情不似圓通輩，談病何如積翠流。
每愧向來多寵賜，豈圖今日更推優。
此恩此意誠難報，惟演真乘讚化猷。

奉制賦靈谷寺住持濬天淵三首

聖朝新建鍾山寺，此日禪翁奉詔居。
雲漢載瞻仙闕近，山林大啓法筵初。
世緣隨順心無著，靜地重修趣有餘。
萬籟不生鐘鼓寂，一堂松月夜窻虛。

五年闕下預朝班
新奉綸音又住山
覺苑喜逢今日盛
道林行見古風還
豈惟行業高流輩
更有才名動世間
五色奎文曾賜與
朝回擎出九重關

入門撾鼓便陞堂
龍象筵中聽舉揚
最上宗乘開後學
無邊壽量祝吾皇
人心都與天心合
法運將隨國運昌
從此山林增氣槩
松頭白鶴也低昂

應制詠鍾山老僧雪中早朝

鍾山禪客早朝天
毳衲披來雪半肩
好似解空無住著

龐眉皓首玉階前

應制賦無事出山

白雲巖壑自幽閒
偶被天風引出山
本是無心亦無事
曉來只欲近龍顏

應制賦甘露詩十二韻

天地清寧日時和
歲又豐側聞甘露下
近自禁城東漸
漚浮松上晶熒絢
日中圓明珠的皪
透映玉玲瓏喜訝
霜初結驚看雪未融
奇祥慶雲類嘉應
醴泉同競采千

金一
卷一
官合高擎衆騎叢獻當青瑣闥覆以碧紗籠勝味醍醐
劣清光沆瀣空薦登先祖考分賜及王公載筆歸青史
歌詩付樂工敢隨鴛鴦序稱頌未央宮

全室外集卷一

欽定四庫全書

全室外集卷二

明 釋宗泐 撰

樂府

長安道

長安大道八達分道旁
甲第連青雲夜月長明七貴宅
春風偏在五侯門
貴侯勢焰不可炙
烈火射天天為赤
家僮盡衛明光宮
侍史皆除二千石
一朝盛衰忽顛倒

夜月春風亦相笑鳳笙龍管坐不來又向東家作新調
東家車馬日已多向來賓從無經過貴賤交情捻如此
翟公何事嘆雀羅

戰城南

進兵龍城南轉戰天山道烽烟漲平漠殺氣靈荒徼將
軍重爵位天子尚征討不辭鬪死多但恨生男少

空城雀

啾啾空城雀戀戀空城曲朝傍空城飛莫向空城宿草

窠乳子成埽土翻身浴不隨鳳凰遊不畏鷹鷂逐野田
豈無黍太倉豈無粟食粟遭網羅食黍傷箭鏃丁寧黃
口雛飲水懷止足歲晚雖苦飢全軀保微族

風入松

高堂初宵山月明長松颼颼奏清聲清聲希微坐獨聽
援琴細意寫得成調弦轉軫聲方起忽覺松風生繞指
更深鬼哭巖前雲夜半龍吟澤中水一彈一奏聲緩促
有似松風時斷續含商流徵清復哀能使幽人聽不足

聽不足琴忽罷此時寂寂松無風明月滿天涼露下

桂之樹行

桂之樹桂生一何偏兩株分立於庭前西株憔悴東株
妍桂之樹桂生一何蠹西株方來采其榮東株又復無
人顧桂兮桂兮非汝憐縱觀萬事無不然武安堂上席
方暖魏其門前秋草芊莫道榮枯長異勢從來反覆無
根蒂高歌感激君不聽請君試看庭前桂

俠客行

平生重然諾意氣橫素秋拔劍悲風吼上馬行報仇報
仇向何處堂堂九衢路突上秦王庭直入韓相府回身
視劍鏢血漬霜華薄敢持一片心為君摧五岳五岳即
可摧此心終不灰恥沒兒女手完質歸泉臺

西極天馬歌

天馬來自西極流汗溝朱蹄踏石眊目逕度流沙磧天
子見之心始降九州欲省民瘼瘡宛王何人敢私有貳
師城堅亦難守等閒騎向瑤池前周家八駿爭垂首天

閑飽秣玉山禾苗春來亦漸多感君意氣為君死一
日從君行萬里

盛唐樅陽歌

漢家天子天馬良羽林十萬何煌煌山川望秩禮孔彰
誰言此竟成淫荒舳艫千里長江水江平浪穩頑蛟死
擬金伐鼓海上過驚散蓬萊幾仙子朱衣急走傳詔書
乘輿所至除田租載拜願君千萬壽歲歲望君一巡狩

交門歌

不其山頭月將午交門沉沉夜擊鼓博山火熱凝絳烟
霓旌藻騎來容與玉顏綽約含春花向坐分明君自覩
君心有欲神不違側耳傾心聽好語雲收雨散意不傳
起望星河獨延佇明朝更入芝房齋神其相之復來下
茂陵新樹起哀風五柞宮中淚如雨

江南曲

泛舟出晴溪溪迴抱山轉欲采芙蓉花亭亭秋水遠心
非檣上帆隨風豈舒卷但得紅芳遲何辭歲年晚

隴頭水

隴樹蒼蒼隴坂長
征人隴上迴望鄉
停車立馬不能去
况復隴水驚斷腸
誰言此水源無極
盡是征人流淚積
拔劍斫斷令不流
莫教惹動征人愁
水聲不斷愁還起
淚下還滴東流水
封書和淚付東流
為我殷勤達鄉里

春江曲

春江沉沉春水滿
柳條拂水蒲芽短
鴛鴦睡美不畏人
日色遲遲素沙暖

平陵東

赤運中微光不競奸雄竊比周公聖滿朝盡是蒙漢恩
忍為新家頌符命當時憤激惟義公挺身一呼生雄風
時哉不偶命也窮至今人怨平陵東

猛虎行

雷霆為威電為目行處腥風動林木利牙如劍生食人
婦女獨在家中哭城東少年名射獵聞此揚鞭去還捷
却將羅網四散張擬欲當前氣先懾周郎膽氣何獨豪

等閒射殺仍斬蛟

上之回

塹崇山堙鉅谷發軔甘泉狩維北屬車連連複道平離
宮況有三十六蕭關無堠塞無烽單于稱臣月氏服上
之回朝萬國

巫山高

巫山高望不極十二危峰倚天碧陽臺神女徒盈盈艷
質妖容果誰識襄王荒恠不足徵宋玉微辭豈堪惜至

今雲雨自朝昏山鬼哀猿叫蒼壁

短歌行

白日去茫茫清川流浩浩有生能幾何少壯忽復老王
母蟠桃花萎紅不成好扶桑半摧枯枝葉隨瀛島仙人
王子喬兩鬢如秋草况聞安期生形容亦枯槁漢武與
秦皇一生空自擾短歌詠至言庶以安懷抱

苦寒行

祝融峰南三尺雪黃河到底頑冰結洛陽賈客船拖膠

長安公卿馬蹄裂人言富貴即可避貧賤從來不相棄
昨夜樹頭風簌簌東家孤子號天哭

挽歌

陰風起枯楊寒日照衰草丹旒辭中堂輜車即周道親
戚及隣里送者皆素縞一歸長夜臺萬古不得曉憶昔
盛容儀被服懷美佼今采朽腐餘復為蝼蟻擾富貴與
榮華滅迹空中鳥彭殤久已淪不知誰壽夭

古塞下曲

候吏過輪臺傳言敵可摧嫖姚揚旆出驍騎治兵來瀚
海驚波湧陰山積雪開前軍正酣戰日暮氣雄哉

三臺詞二首

年去年來易老花開花落相催便是封侯萬戶何如儘
意三臺

采藥樓船久去傳書青鳥不來海水何時清淺蟠桃幾
樹花開

銅雀臺

西陵樹色暮蒼蒼
明月相將入御床
寂寂帳前歌舞歇
幾多含涕憶君王

楊柳枝詞

赤闌橋外有東風
舞態委蛇學不工
公子等閒來繫馬
梢頭斜插酒旗紅

萬樹千株汴水隈
春風青眼為誰開
錦帆曾拂中間過
只到楊州竟不迴

百花洲畔覆青坡
第六橋頭蘸碧波
鳳管龍笙春寂寂

綠陰終日伴漁歌

祖龍歌行

祖龍迺好長生者沉璧徒來華山下目斷樓船海氣昏
鮑車亂臭沙丘野驪山下銅三泉開泉頭宮殿仍崔嵬
當時輸作方臚臚函谷無關小龍死百尺降旗輶道傍
十二金人淚如水

長安少年行

日晚新豐醉酒迴玉鞭敲鐙萬人開綠槐馳道橫穿過

金八八二
不管金吾導騎來

鬪雞贏得海東青
臂向東街覓弟兄
白馬翩翩相逐去
灞陵原上曉雲平

腰下青蛇鞘裏鳴
一身長為報讎輕
今朝莫共空街語
京兆新聞廣漢名

從軍行

明月照孤營
蕭條數聲角
開門天宇高
仰見妖星落
撫髀一慨慷
龍泉立鳴躍

少壯方矜武克渠遠避威力全金鎬迅氣勇鉄鎗飛正
馬搜山去生擒探卒歸

拾骨當炊薪淘屍作泉窟平野不見人寒雲鴈飛沒悄
悄橫吹悲梅花為誰發

草枯馬不肥風烈衣盡破建牙帳外立枕鞍雪中臥倉
皇火伴驚校尉點兵過

微霜下高城哀笳破新弄孰使耳邊來驚我還鄉夢家
貧子尚孩寒衣復誰送

天雨雪

天雨雪出門何所之渡河正遇風浪惡回船少住溪水
湄舉頭見飛鳥斂翅欲下無樹枝

武溪深

滔滔武溪載廣載深我今欲濟兮畏此毒淫武溪滔滔
飛鳶跼跼我不先濟兮士不敢涉既濟既涉我師孔武
蠢爾有蠻服我王度

楚妃歎

宮城禁兵夜簇簇君王不返宮中宿戎車彭彭雲夢林
獵火煌煌漢臯曲章華臺前江水流君心如水平無日休
虎狼勍敵却不憂草間狐兔為深讎

寄遠曲

美人別時春尚早清池坐見芙蓉老湘江水滿鷓鴣飛
夢中歷歷相逢道黃金可變石可移此心皎皎終不欺
登高丘而望遠海

登高丘望東溟溟水方蕩激中有怒吼鯨鯨脊類峰嶽

鼓浪如雷霆噓涎噴沫雲霧冥揚鬚掉尾三山傾腹吞
巨舟者百十蝦蟇不足飢腸撐奈何驕悍當海橫官漕
賈舶不敢行蛟人織綃機杼傳神仙跼蹐居蓬瀛天吳
既辟易龍伯亦震驚徒為蟲族長空有水神名制御一
顛倒含羞請尋盟吁嗟彼鯨何爾獐恃其險惡雄勢成
若失此海水何以藏其形使居陸旱間轉眼遭剝烹海
濱壯士瞋目瞪拔劍欲往心懸旌曷不訴之於上帝天
威下殛無遺生立見海水清且平海光不動青瑤瑤

王子喬

王子喬好神仙吹笙駕白鶴遨遊上青天青天一去三
千年七月七日緱山巔下士慕之空爾憐寧知有氣凝
丹田

獨漉篇

獨漉復獨漉水深泥更濁水深終見底泥濁不見石翩
翩者鳬鳥引子遊水湄我豈無矰繳悵然為爾悲南山
有喬木北山有梓樹此物本無情俯仰如有度羅幃空

堂上塵暗蛛絲繞倚門久踟躕慷慨不可道床頭龍鱗
劍中夜躍鞘頻交饑不及報空愧七尺身斑斑深山虎
白日下林麓豈敢避生獍人能食其肉

三閣詞

複道麗明霞阿房未當奢半空傳笑語長夜後庭花
檻車出城去望閣暫回頭昔道千年樂今成萬古愁

墓上華

墓上華開滿枝行人看花行為遲行人有恨花不知不

生名園使人愛却生墓上令人哀誰家此墓臨古道寒
食無人來祭掃莫是東君惜無主遣此閒花伴幽兆聊
持一杯酒酌爾泉下客今日此花開正好但恐明日花
狼籍人生似花能幾時古人今人皆可悲

道傍屋

道傍誰家有古屋主人不在行人宿門戶蕭條四壁空
野草依然暎階綠春燕歸來細相認繞屋低飛疑不定
徒令獨客久咨嗟無復高堂樂繁盛一從兵火照坤維

十家九家無子遺願留此屋行人宿莫問主人歸不歸

南鴈詞

胡鴈向南飛八月湘江道水清菰米香兩岸被紅蓼
栖息已自安飲啄良易飽不憂羅網危方矜羽毛好故鄉
窮漢陸歸夢空香杳蕭條古塞春雪深沙浩浩

烏啼曲

并序

天台王文起以故官例遷汴梁念其親老不
得朝夕養思慕彌篤其寓邸旁有古槐樹俄

羣鳥集啼其上久而弗去及文起以舍壞遷
其居鳥亦隨之其孝感有如此者予聞而異
之遂作烏啼曲一首

客舍門前古槐樹羣鳥啞啞啼不去烏啼解知人意苦
遷客思親朝復暮五年生死無消息一聞烏啼淚沾臆
汴水東流白日飛老親在南免在北南地靈鵲北地烏
烏啼報有平安書

善世曲 迎佛

體虛凝兮真常妙應化兮無方啓崇筵兮日吉辰良禮
孔修兮眇躬齋莊目眷眷兮遙望感必通兮在誠叶紫
磨軀兮白玉毫光駕雲車兮旌幡侍傍瞻閭浮兮斯格
仰盛容兮洋洋

昭信曲

獻香幣

維此妙香五分普熏筐篚斯實有玄有纁物微禮具敬
奉慈尊庶祈鑒只展我殷勤

延慈曲

初獻供

泥連先饋純陀後供進茲肴饍間奏鼓鐘皿器斯潔黍稷惟豐無遠弗届至誠廼通

法喜曲

亞獻供

仁風廣被春日載熙天人共仰顯幽靡遺豈惟華竺覃及島夷因齋以頌於禮攸宜

禪悅曲

三獻供

禮誠在敬三獻靡加釋尊燕喜樂奏無譁明徵瑞應昭著光華冥幽溥濟蒙被禎嘉

徧應曲

徹豆

餽馨既歆籩豆尚列始終匪懈肅雍以徹禮文有序樂舞有節洋洋在上無意弗達

妙濟曲

送佛

赫其臨兮優遊俄復去兮難留八部從兮如毛音謀儼先
後兮靈輶凝睇兮夷猶冀慈雲兮遐周

善成曲

望燎

瞻燎于西祥焰騰空惟饌與帛遙達靈宮仰慈于玄祀

禮有終企而眷之大地真風

獻幣

禮有至重無踰法施浩乎鉅海孰知其際欲致微衷敬
奉茲幣以報以祈式嚴祀事

獻茶

有茁者茗于彼先春泉甘且潔薦此芳新味相本空識
含根塵不腆其物所獻惟寅

讚佛上

下堯率兮悲智融跡垂化兮誕王宮金園幽兮寶樹重
浴聖體兮香泉濛角衆伎兮伊誰同世所習兮殫精通
覩四相兮心忡忡夜逾城兮登雪峰一麻食兮苦行工
羣魔却兮波旬降廓妙悟兮星瞳瞳託修證兮成厥功
應世間兮月行空燭羣幽兮開衆蒙海之鉅兮罔不容
道無上兮稱太雄

讚佛中

成覺道兮坐寶蓮金容赫兮螺髻旋威德聖兮福慧全

三身具分萬行圓演一音分龍象筵應羣機分施化權
由雜花分至鹿園大小乘分假蹄筌彼諸子分悔應愆
運大車分等無偏囑王臣分法流傳末拈花分妙無言
三百會分五十年度弟子分陳如先量虛空分知其邊
讚功德分何由宣

讚佛下

猗正體分住靈山順世間分處泥洹雙林白分浩漫漫
天人憂分發長嘆香樓成分架寶棺火光煜分設利繁

應軀謝兮聲教存崇遺範兮集法言化周流兮亘五天
後千祀兮來真丹道無為兮妙莫論顯幽利兮神明完
資世治兮輔化源善以勸兮惡以悛佩聖謨兮矢弗諼
願永劫兮垂無垠

歌福應

大哉覺皇乘悲願以度人視羣生如赤子運廣大之慈
仁降福垂祐若時之春有萌必達其生蓁蓁今日何日
漸漑膏澤愉樂且恂尚克均于衆庶匪獨萃于一身

全室外集卷二

欽定四庫全書

全室外集卷三

明 釋宗泐 撰

五言古詩

寶訓堂

聖君體皇極建國封親王全蜀形勝地西南控戎羌劍閣天下壯象馬稱瞿唐堡障千萬祀崇德乃安康昭鑒有嚴訓寶之靡或忘服御既有節出入亦有常上承宗

廟重下垂睂祚長開門看天宇白日行穹蒼中宵卷簾
坐仰視北斗光羹牆契王意一飯在斯堂

喜清遠兄至以齊已詩長憶舊山日與君同聚

沙十字為韻

一別動二紀累念山海長何期風雪裏來此溪上航乍
見如不識大喜忽欲狂燈花解人意今夕爛生光

因亂阻殊邦及見消徃憶始愛道貌清復驚鬢毛白論
新無少驩話舊有深惻坐久忽忘言芳梅照寒席

前年澗僧來稍稍聞去就持斧住越山移幢入吳岫高
居既隣支朗詠亦依畫應世自無心麻衣澹如舊

今年遠書至念我戀茲山如魚在池沼江海忘徃還不
才負高誼此生多厚顏惟思拂衣好老去一身閒

昔事龍河師法筵全盛日童年與君居衆訝早入室廻
首白日飛浩劫彈指疾平生竟何為志願良未畢

良友平生親風塵散何許草莽或零落雲霄亦騫舉天
地日淒涼折芳欲誰與所嗟芙蓉花白露下秋浦

昔下廬山雲停橈宛水濱咫尺不我見千里長思君却
寄千金劍寒光動星文至今在篋笥騰氣時絢緼

少年同居日聞君拂絲桐高齋月照席兩耳生秋風當
時青雲士奇文詠空同往事春花歇江水今自東

人生空中雲東西散復聚古來賢達輩何曾定出處乘
流任所之過險從自阻今日偶重逢相看復何語

同遊賞溪曲清興浩無涯澄潭弄新綠芳蹊踏晴沙綠
崖采秋菊寧林摘春茶留連此中意當期歲月賒

懷以仁講師入觀圖

旭日千萬峰白雲三四朶一笑山容開獨自松下坐瀑
流天上來飛花面前墮此時中觀成無物亦無我

雪上題青山書舍圖為周伯陽作

春日遊苔雪復茲對畫圖青山白雲際綠樹幽人廬衆
芳生礧曲新泉落巖跌不見黃叔度東風忽愁予

雜詩十一首

少小薄世榮雲泉寄幽賞冉冉三十年誤身墮塵網流

形大化內萬古同羈鞅得中久已安遺外非所強但望
還山雲時時結遐想婆娑雙桂樹芳枝春正長

自我來涇川星歲已再周託茲山水勝謂可成遲留奈
何外物牽撫事心悠悠久知世道惡奚事仍夷猶瑯林
有奇鶴未常識羅浮翩然覓靈鳳接翅昆侖丘

羣邪可干正衆枉能矯直蕭條孤生篁隱忍在叢棘白
壁竟何愆青蠅自懷慝公論苟不存孰辨夷與跖

伯陽西度關仲尼東浮海道大無所容一身置何在蘭

蕙秋風前芳香竟誰采
天道自茫茫知命不復悔
栖栖止百年赫赫向千載

呂梁險可逾大行危可陟
如何方寸間中自多荆棘
尊前生白刃舟中起敵國
一感睚眦瞋報之甚仇隙
咄嗟難與居俯仰隘八極
思欲凌風翔恨無凌風翼

猛虎出深山往往多渴飢
居然肆彼惡墮突當九達
機檻素弗設赤手安可羈
衝飈激脩坂白日翳陰霾
吾思陽羨子延佇心淒其

夜久無與適塊然坐空堂白鳥一何多營營來我傍靜
言聊假寐遂以襲單裳嗜膚猶可忍聒耳諒難當晨星
耀東廡明月度西廂念爾能幾何滅跡於朝陽

福禍無定在倚伏誰先知於事既難料在理亦罔推西
伯稱大聖美里却見縻况居千載下風教日已衰願君
畧形累所存心不欺

魯連天下士片言能解紛千金博一笑永絕平原君高
蹈東海上卷舒若浮雲清風散八表繼者今誰聞

四月維孟夏六陽云已盈靡草夕凋瘁螻蛄最悲鳴運
序迭衰王萬彙紛枯榮斯理信昭灼君子宜守貞

清晨曲肱卧夢昇華頂岑殊庭就巖構左右修竹林仙
人五六輩列坐調玉琴莞然顧我笑子獨何苦心石梁
有縣水濯此塵中襟

冰雪窩

道人冰雪窩巖栖稱岑寂洞門白日陰三徑青苔色片
雲簷外生落葉階前積更深芋火紅晝靜茶烟碧淡泊

中自怡安居無不適彼美西方人時時勞念憶

送裕上人歸天台

我家赤城東不識華頂嶠遠道送君歸昨夜夢中到崖
泓有泉瓢竹室留茶竈珍重山中人拂衣願同調

梅詠

天寒清澗阿貞姿照冰雪幽賞衆莫同孤芳為誰發東
園桃李春簫鼓夕猶咽君子天一涯微香坐消歇

送銛上人省親

青山澹斜暉驚風在高樹行客起遐思雙親髮垂素雲
飛滄海遙雁下寒空暮老來惟夢歸隨君故鄉路

題五龍山房圖

剡中東南奇若人緇侶勝一住忽十年禪房得深靜高
扉敞重崖修橋入危磴林端識名香水際聞清磬微茫
度雲壑掩映披華逕長松支遁吟盤石曇猷定別來幾
夢思遊塵生塵柄晨窻對新圖蕭條發孤詠

春雨吟

驅車涉泥坂首路流大河河水際天白飄風激層波神
龍不安處作橫鯨與鼉强暴相啖噬纖鱗其如何感此
吾安適旋駕西山阿碩人不敢擬考槃有遺歌

溪南有奇山不見二十日今朝雲忽去天高數峰出東
風晚生寒細雨又復密坐觀微霧昇化作白練幕側想
巖居人林卧頭不櫛崖滑徑且暗何由采芝朮

桓茂倫詩

并序

予所居水西寺右有山曰湖山晉宣城內史

贈太常桓簡公彝之廟在馬頌余嘗讀晉史
愛其人致死王事志節可尚遂造其祠作詩
弔之

晉氏中遷播期運仍邁屯奸雄覬周鼎聯翩起峻敦伊
人抱中和勁節凌秋旻骭髀救國難捐軀遂成仁方其
少孤日識鑑夙有開高追郭許迹迥邁周庾塵迨夫職
常侍密謀佐戎軒皇綱藉輔翼男爵示公勤簡才鎮宣
郡王室得屏藩抗表非所任迺獲依先墳未幾豺虎橫

長驅逼帝閭，糾衆前赴敵。誓欲如鷹鷂，一聞王師潰。流涕下沾巾，偽和安忍垢。壯氣雄九軍，朱生既効力。俞子亦懷恩，時哉久失利。力屈涇川濱，玄兆誠不謬。果爾符景純，世和倡高義。收勦歸下泉，巖巖太常贈。燐燐光前文，時有下都督。方駕揚清芬，後來富瓜瓞。挾貴負崇勛，夫何忝令德。逆節生君門，昔余探古史。掩卷思其人，茲焉董山寺。華祠照西隣，是邦足遺愛。炳煥圖像存，蘋蘩累登薦。簫鼓無冬春，私衷若神契。酌水酹忠魂，雲屏下

雜沓徒御來駿奔微生久息影於世無戚欣因君激五
內慷慨著斯言

病中作

此疾從何生形容遽憔悴默默求其端體弱易為致始
受寒熱攻恍然若沉醉兀坐強自持倒卧終不寐朝聞
樹間蟬意覺秋風至夜窻月逾明悲蛩攪情思嘗窺衛
生術吐納運六氣呼童具杵臼稍復親藥餌今辰眼忽
明展書識文字起繞中庭行兩足如重脰况逢亢陽災

高旻尚炎熾秔稻化為茅糲食恐不備一身固多患又
復念時事不到無生域空為有形累

雷氏逸清堂

逸人在山澤境靜心自清樹堂不必廣取適三四楹几
席何所有圖書浩縱橫尊壘時復具客至輒與傾東風
散庭樹衆鳥相和鳴高歌有至樂所樂非世情食薇卧
首陽空留苦節名舊衣起草廬勛業竟何成士師與乘
田行義不在榮嗟嗟雷夫子吾知得其生

斲黃獨

雨歇林氣涼草沒澗西路荷鉏入深幽石邊欣一遇長
歌對白雲清風滿山樹向來垂涕人遙遙千載慕

采芹

深渚芹生密淺渚芹生稀采稀不濡足采密畏沾衣凌
晨携筐去及午行歌歸道逢李將軍馳獸春乘肥

霜下菊

英英當窻菊獨於霜下妍誰知婉婉姿中自抱貞堅衆

弁值陽和競媚東風前當時豈不好于今乃淒然昔人
曾謂此能為制頽年吾生寧復爾但用寫幽悵

西澗獨行憶相空

今旦風日好獨尋西澗行叢梅未盡拆幽蘭已復生樹
頭暖光泛石罅新泉鳴遇境意自適思與良友并

冬夜憶清遠道初二兄

夜深霜氣寒窻月皎如燭鳴鴻尚遐征孤鶴亦驚宿念
我平生親悵焉動心曲四明是何處苔溪如在目異方

詎能通遠道何由縮十年無一字信是如金玉白髮漸
欺人晤言安可卜

寓興

水草冬不死豈為寒所侵巖松風力勁歲暮青滿林念
彼苦節士艱難持素心雖存太古操惜哉無知音守中
固有道庶為君子欽

無旨兄將歸番易龍臺寺遂用宋洪內翰遊茲
寺韻賦古詩一首以贈

十年兩情展一旦千里違念此俱皓首晤言寧有時楚
天眇無際孤雲杳難期故山樟樹老秋風亦剛薇舊房
兵後在勝侶存者稀諸孫新入道迎歸候傳衣

蘭窻詩為戴原忠賦

蘭生在深谷獨負幽貞姿一蒙君子賞遂與巖壑辭移
植南窻下靡靡生華滋綠葉承曉露微香散清颼美人
結新愛似遇深相知取適會良友怡情吐芳詞自登柏
臺選經歲忽若遺常恐霜霰侵復畏萋草欺擷英欲為

佩青年阻良期異鄉不可見天長有餘思

酬張來儀見寄

東閣日無事能枉野人書坐想西巖菊寒花媚秋餘閑
聞車馬道赫赫王侯居寂寞揚子雲遊心在玄虛

監齋詩贈毛起宗

禱晴嚴祀典名山啓靈壇奏章通玉帝環珮集仙官祥
光紛下燭誠心馳上干瑤空景方霽金漏夕未闌衆職
或少怠飛文遂清彈居然執法吏凜若秋霜寒沉沉虎

豹戶肅肅獬豸冠始知天人際監齋良獨難

風雪歸莊圖

山路獨歸翁手携一壺酒千林雪正深扁舟在溪口茅茨闕石根垂蘿穿戶牖江城看圖人幾迴興嘆久

辛亥新歲程處士見過常孰別墅臨別賦詩

獻歲春未迴風雨連十日荒村少朋驩窮巷絕人跡程君泛扁舟茅齋破幽寂遠來見真情款言忘永夕顧惟艱難際出處各有後世紛日相纏誰能念疇昔因君尚

道誼臨別增太息獨棹去茫茫空瞻海虞碧

莫過賞溪

日莫衆鳥歸孤雲亦還山市人爭渡息小舟沙際閒我
屋西峰下半出青林間鐘聲動深念無爲尚塵寰

雜詩

落葉委通衢紛然無人掃但覩新行迹不見舊時道古
木倚道旁亂藤絡其杪歲暮雖青青終非本容好世人
懷徃途悟此苦不早振衣無後期來從漢陰老

夏夜與錢子貞坐西齋以欲覺聞晨鐘令人發
深省之句為韻各賦詩以敘會別之意

一見江海奇夙聞鐘鼎傲山靈訝雄談木客爭清嘯悠
悠鹿門期落落東海蹈笑問經世人大夢誰先覺

明月不可招流光入堂中白雲不可約掛我屋上松茲
會固難得後會寧易逢明朝在東郭隔水但聞鐘

無能甘寂寞息影在山深采薇東谷口汲泉西澗潯朝
隨白雲往夕伴清猿吟他時倘相憶遺我天外音

曲池難容舸狹路不可騁萬事付一點閉關深自省魚
行不動波鳥飛無遺影何處未忘情月白空山靜

題山水圖

辭山始魚旬見山心輒喜披圖忽悄然舊遊宛相似微
茫敬亭雲迢遞賞溪水猿啼樹蒼蒼漚泛波靡靡巖阿
桂叢生茅屋無人理何為滯江城眯眼苗塵起

奉和劉彥基待相空至

實公同門英論交二十載賦詩多新語亦足邁前代偶

與仙翁言久別思一會溪山入春明花鳥亦相待孤雲
本無期行蹤定何在日暮倚東風踈鐘起天外

答夏景瞻

昔居賞溪曲怵迫靡所侵衲衣掛石壁燕坐長松陰子
來慰幽寂語合相知深孤雲十年別明月千里心而我
亦何事投迹此禪林向來結茅地回首空青岑寧知江
海遠遇子復在今百挫志矯矯猶能發狂吟清辭入古
調一鼓薰風琴吁嗟衆響作過耳無留音

柯生畊讀軒

耕田村外歸抱書窻下讀讀書期業成耕田待秋熟一
飯充朝飢所願良亦足聖賢日相親志不在干祿白水
涵春陂青燈照茅屋寵辱吾不知門前羽山綠

贈畦樂翁

開圃藝嘉蔬芳畦繞茅屋春雨昨夜來滿眼浮新綠短
鋤日已携不課免與僕但知此中趣餘外非所欲陶令
頗從容董生何局促浩歌對青山孤雲暮歸麓

裴季和著存堂

白日山下沒長江天際流思親無時已寸心良悠悠高
堂親所憩虛榻經幾秋桑梓必恭敬況此今尚留憶昔
具慶日艱難進庶羞吁嗟受君祿庭樹風颼颼

分題八功德水送人歸金華

鍾山祇樹園中涵一池碧貯滿忽若虛測深杳無極遙
通太液波近映寶珠色八德類淨區奇蓮毓靈質屢同
金華彥煩襟時一滌垂筒汲清甘煮茗松月夕今朝惜

分袂對此翻不憚歸弄雙溪流應思池上客

朝陽軒

開軒面東旭晴光絢蒲座霜顱眼倍明壤袖如雲破乞
來五色帛針線堪自課窓戶洞虛白心田無雜漚爐香
裊餘烟梵唱松風和天寒補未完短日簷前過

耕樂軒

耕田良苦辛所樂果何事百年安吾生食力非役志衡
門無軒車榆柳蔭閒地遙遙草廬人回首空長喟

分題道林寶塔送貫道先生歸湖南

鍾山禁城東浮圖出林麓層級凌紫烟虛簷交翠木異
人昔垂化千載有遺躅夕夢鏗清鐘晨筵散華燭一諧
湖南英憑高曠遊目江山環帝京形勝天下獨安知復
過邁悵焉此遐矚寒日下西南輕帆駕孤鵠

題三笑圖

過橋本無心三笑亦偶爾當時肯垂名好事傳畫史巍
巍匡廬峰湜湜虎溪水援筆寫清高幽興殊未已

分題龍宮寶石送陳庭學之官成都

成都山水區龍宮遺寶石苔蘚滋古紋波濤含潤色
驪珠化海榴神變安可測想當聽經時雲寒夜堂寂蜀中
天下險兵戈屢充斥城郭雖已非此石尚如昔京華歲
將闌萬里送行客時清衛府間搜奇撫陳迹平生獨往
願蹉跎頭半白悵望西南天空慙遠飛翼成都唐高僧
智浩常誦法
華經所居近龍祠龍女時來聽經一夕遺一明珠不受
珠化為石似石榴以水洗之有四字曰龍宮寶石至今
焉存

出峽圖

瞿塘水如馬五月不可下兩舟何處來披圖一驚詫前行稍趨平勢若閒暇者後來方履險衆驚不停把巖迴古木披峽束哀湍瀉嗟爾駕舟人安危在揀舍

松石室

青青山上松鑿鑿山下石移來近禪居窻戶生秀色室中老比丘怡然坐終日轉境不在遺觀心了無得疎雨洒嶄巖微風動蕭瑟所適不自知何有喧與寂

日彰法師得旨還山王生作泉石閒齋圖予題

詩其上以為贈行

奉詔還故山江船復東下獨帆如飛鴻秋日照平野王
侯贈新圖山水儼幽雅石崖天際高茅屋松下清香
散佛龕妙觀了空假白雲席上生碧溜堦前瀉神清境
自閒所適無取捨佳趣政在茲健筆老能寫乃知遺世
情獨有還山者安得添我身閒齋共瀟灑

張侍郎栖鳳山房詩

番禺饒名山鳳臺獨奇峭丹崖耀白日連林際飛鳥葛
嶺勢相向羅浮狀如抱昔年鳳來栖高梧成翠葆山房
結構新門徑烟花繞幽人不出戶典墳肆探討卷簾蘭
氣清倚檻泉聲小騎羊五仙侶時時來論道一從乘傳
車十年迹如埽出處成兩途榮華異枯槁披圖思茫然
夢中歸路杳炎海靜無波秋巖桂花老

萱堂詩

堂後萱花明堂中白髮清堂下弟與兄上堂稱壽觥白

髮常在眼，謾花願長榮。人生有至樂，此堂日日陞。

雨花臺送客

梁朝雨花臺，近在城南陌。不見講經人，空林澹秋色。登高俯大江，目送千里客。白鳥下滄波，孤帆遠山碧。

題竹石圖

竹石吾所愛，眼中無此清。如在異鄉客，忽逢親弟兄。竒質含古潤，虛心抱幽貞。渾忘是圖畫，疑有風雲生。

焦山寺鑑師臨江軒

一峰如鉅石屹立江水中寶剎蔚崇構勢與山爭雄若
人於此住超然塵外蹤開軒當水面下瞰馮夷宮魚龍
近几席波濤蕩襟胸有時天宇淨倒影清若空燕坐觀
衆有起滅殊無窮一念寂不動嗒焉心境融焦先邈千
載遺丹射林紅浩歌倚闌夕明月生海東

送大彰徐博士還錢塘以客路青山外五字為

韻賦詩五首

白髮出都城青山引歸策涼風江上秋驚濤海門夕老

驥厭長途倦鳥思斂翅芙蓉白露零惆悵遠行客

出郭醒客心馳車復東路得官遂清貧還家慰遲莫諸
生日討論詩書自成趣閒尋南塢僧長吟倚巖樹

少壯若傲世閒居謝榮名徵書劇羽檄白首試大廷人
材樂教育泮水清風生應憐舊山桂歲暮有餘青

流水出山外固不如在山孤雲度天際眇眇何時還伊
余巖下客于今乃塵寰逢君一長嘯人生有誰閒

累懷湖寺逢何時江城會况當秋夜凉明月坐相對來

日非今日握手復一慨相別無遠行出門即天外

汧陽雪中

朝寒擁衾坐隔屋聞書聲起埽車上雪千山雲霧冥春
泥沒深轍前路不可行雖無督促令惻惻如有程邑中
賢令佐尤篤鄉里情暖屋延笑語照眼雙璧清憫此逆
旅懷忘却留滯并行客何所願長歌望天晴

孤凰引鵷行題何氏母子貞孝卷

丹山有孤凰獨引羣鳳兜朝曛待哺急風雨護巢危鳳

兜日長大感念凰母慈母亦弗忍舍願兜長相隨晨曦
出暘谷文采方葳蕤和鳴當盛世九土春熙熙上林有
竹實亦有梧桐枝嗟爾母與兜銜圖一來儀

題畫

青山半天高白雲如海濤溪流轉谷口茅廬闕林坳山
人何處去月明猿夜號

寄題雲門松風閣

何處聽松風金雞山下閣夜涼月照窻冷然滿幽壑如

卧江上樓夢覺海濤作疑行洞庭野兩耳鈞天樂溪翁
聞性空妙觸了無著野馬從鼓漂太虛自寥廓緬懷師
友情撫卷翻不樂人亡閣亦非題詩付冥漠

松下居偶作

我此松下居即事良可悅閉戶留白雲開軒放明月松
響風急來泉流雨初歇時有西齋人相親默無說

送僧遊廬山

廬山天下奇良游遂平素江帆渺何之連峰散晴霧雲

端五老人粲然風骨露青衣或來迎木客時相遇夜坐
松底石天燈知幾處忽聞巖際鐘忘却東林路

送瑄上人

揚舲下大江江寒欲飛雪高帆天際遙獨鴈雲邊沒烟
波渺何之條忽成楚越遂令白首人年華感消歇

不羈行贈吳客

侑儻不偶世落魄江海游雖來京國久不謁公與侯仙
人五城高彩雲十二樓天街看明月一身風露秋翩然

下揚子棹歌發吳謳太湖三萬頃鳬鴈中沉浮且作拍
浪兒赤脚坐船頭笑指闔閭墓千古成荒丘

樂樵

明時忘世士所樂在樵蘇自無鐘鼎念此心常宴如清
晨礪斧出孤雲引行裾薄暮負薪入明月照庭除新芻
已在甕隣叟行可呼大瓢喜滿眼醉後歌嗚嗚青天若
覆盂白日無根株不見北邙道貴賤同丘墟

夜坐雜言次韻

老來百念忘外緣何用屏乘月坐更深和雲卧峰頂青
燈靜照壁白髮垂到領尚懷分芋人寒巖甘息影
羣生不同趣所本非異原有耳醉曼曲誰能聽玄言粲
粲白月珠可照長夜昏不逢希世客吾衰尚何論

明月出東嶺照我窻牖間羣動夜方息白雲亦孤還緬
思支道林沃州曾買山遠公竟不出逸駕安可攀

坐致不請友翩然遠來集幻境非久留白日西馳急此
宵曾幾何晨露下階濕紅顏不可駐瑶草無人拾

再用韻二首

孤燈坐二更茶具獨未屏春寒逼清明紉帽猶在頂大
音本無聞含笑祇自領月上獨亦來窻前弄林影

羣情尚怵迫烈火方燎原縱能齊得喪不如無一言有
耳但如聵有眼從自昏至道念縣曠瑣瑣安足論

隱耕為陳叅政作

孔明南陽廬伊尹有莘野遭時展經綸豈是長隱者陳
君蒲田居耒耜常自把致力良已勤所入未為寡矧今

副方伯承宣及秦夏厚祿代躬耕我冠稱儒雅生逢堯
舜君恥在稷契下他日請歸田此志方可寫

偶地居

偶地即吾廬絕勝樹下宿不在千萬間安居心自足古
人三十年辛勤乃有屋我無一日勞何必較遲速燕坐
白日間青山常在目明月到床前更深代明燭几有寒
山詩興來時一讀十日不出門滿階春草綠

北萱堂

萱草可忘憂樹之北堂後此堂何為設白頭有慈母暑
月萱始花涼風吹戶牖母顏和且悅上堂奉尊酒歲歲
見萱花年年獻親壽免孫滿眼前甘旨亦具有昔當艱
虞時東西屢搔首幸今際承平日不離左右我聞南陔
篇古人相戒守願入北堂詩絃歌同永久

雲巢雪洞

雲巢萬物表雪洞鴻濛先結構自無始安居可長年雪
色共清素雲氣同周旋六窓既虛寂神宇何廓然白鶴

繞巢外長鳴月當天仙人從空來散花滿瑤筵有時乘
飈輪浩蕩游八埏俯視滄溟水倏忽成桑田下士夢未
覺如醉方酣眠茫茫百年內寧知此中玄

蘿壁山房為趣上人作

石壁掛青蘿禪房在其下松枝栽作扉茅覆不用瓦若
人百念忘襟懷自瀟灑行看塢雲生坐聽巖泉瀉怡然
朝復曛在已無取捨於中亦不存何有空與假一從入
山來見山不見野寒拾千載人誰是同流者

題畫

城居不見山披圖得佳趣
茆茨隱石根槎橋入溪路
欹崖勢若飛半嶺開晴霧
將非夢境中或是曾游處
如登華頂峰稍識蔓菁渡
振衣寧後期松華滿春樹

樵隱為江子瑜作

日出上山去日入負薪歸
明月照茅屋涼風吹薜衣
濁醪在瓦缶大白兀自持
嚶嚶春鳥鳴載歌伐木詩
不羨買臣貴不學犢牧悲
軒車自高駕野雉從朝飛
平生一

丘壑此志良弗違田竇門易軌不知誰是非

夜宿陝州

烈風振林木中夜聞號呼重衾冷於水照壁青燈孤念此苦寒月單車走長途明當度關去歲晏將何如

望崑崙

積雪覆層巔冬夏常一色羣峰讓獨雄神君所棲宅傳聞解谷篴造律諧金石草木尚不生竹產疑非的漢使窮河源要領殊未得遂令西戎子千古笑中國老客此


經過望之長太息立馬北風寒回首孤雲白

贈安古心還山中

子來能幾日遽有還山想長笑輕別離一策晨獨往舊
房清澗阿夜雨新泉響門前嘉樹林陰陰夏條長即此
人事絕遂爾長偃仰得句林花開彈琴山月上蕭散世
念踈澹泊道心朗白馭空谷中誰能復羈鞅何彼勢利
人勞生在天壤

待月軒

開軒坐深更待月出東嶺須臾海上來四壁光炯炯托
茲聊自娛觀心庶遺境獨羨寒山人無物堪比並



全室外集卷三

欽定四庫全書

集部
全室外集

卷六
四至

詳校官編修臣翟槐

中書臣劉源溥覆勘

總校官庶吉士臣何思鈞

校對官中書臣嵇承志

謄錄監生臣蔣錦城

謄錄監生臣胡宗高

欽定四庫全書

全室外集卷四

明 釋宗泐 撰

七言古詩

魯王登泰山奉令旨作

宮漏聲沉天欲曉
嚴車整隊東郊道
泰嶽巍然境內山
暇日登臨散襟抱
初聞鼓吹入深谷
倏見旌旗出林杪
捫蘿不憚路崎嶇
直欲高躋極飛鳥
峻拔中霄日觀峰

閭門白馬明雙瞳下視滄溟一杯水六鰲背負三神宮
東封古來天子事石壁千尋刻文字吾王祇欲窮冥搜
颺颺冷風引飛騎上界羣仙朝玉京空中夜半天雞鳴
陰崖鑿開混沌竅石髓飲來毛骨清樂不可極下山去
羽蓋霓幢擁歸路奧域靈區非世間迴首蒼茫隔烟霧

蜀王江漢朝宗圖

江之水出岷山漢之水出嶓冢萬古波濤坤軸動荊州
東下匯流長江漢朝宗名益重大哉金陵天子都萬方

臣子爭奔趨有如百川到溟渤
混茫無際涵空虛賢王
受命封蜀土忠孝為藩奉君父
大義遙挹北辰高保障
西南天一柱江之永漢之廣
靡無綠草年年長誰知派
自天潢分天潢近在青冥上

潭府四暢亭

讀古書彈古琴一亭風月開清襟
臨池洗硯寫新句玉
壺旨酒時一斟如此四暢載登載
臨美哉修身治國上
順君父足以大暢吾王之心
梁園詠雪多士如林河間

禮樂和樂且耽既不泥乎聲色亦不縱乎田禽此亭燕
坐自朝夕亭前花木春陰陰衡山高湘水深天長地久
揚德音

送思上人還雪上

玄冬雨雪方載陰閉門黃葉和雲深重岡複嶺鳥不度
豈有遠客來相尋憐君兩屐無新齒足趼荒途五百里
捫蘿高陟麻姑壇斧冰亂涉琴高水為我巖居十日留
夜窻說盡東西州平生故人得消息既有新喜仍新愁

我方無以慰幽獨子來何遲去何速山川悠悠錫影孤
海闊天高一黃鵠謝君相知未深厚索我詩詞我何有
自嗟百挫英氣摧敢以文字誇人口君當盛年宜自強
美玉雕琢為珪璋明朝別後母相忘水晶宮裏涇川傍

東臯老人歌

東臯老人七十餘眼明能讀細字書年來不肯城郭住
無事只愛東臯居東臯所居良不俗松竹桑榆翠圍屋
前畦後圃花相暎滿眼兒孫美如玉老人心中樂閑曠

時時倚杖東臯上烏紗側裏酒半酣目送飛雲度青嶂
吾知老人與世違東臯幽處無是非吁嗟怵迫何所為
世間富貴多危機

雪舟圖為王公擇作

小船載雪月明裏一色溪山夜如水巖前哀狖噤無聲
沙上眠鷗驚不起引觴擊楫歌調清到門興盡非無情
丹青豈必圖千載王氏風流今尚在

敬亭雲歌送吳子歸宣城

敬亭山中生白雲有時化作五色文從龍下山為雨去
欲與世上祛塵氛由來舒卷不可測遙天炯炯無遺迹
甘雨未洽塵未消直使時人空嘆息歸來偃蹇敬亭上
點綴青山千萬狀曾巔高擁白玉屏半嶺間張素絲障
雲兮雲兮爾才未盡施只恐復被蒼龍知乾坤上下相
追隨青山欲戀無還期

菖蒲歌

蒲生山澤間水石長為徒超然塵土外秀色清而腴印

公愛之如寂公當軒盆植數十叢雖無仙人鸞鳳狀好事剪拂還相同葉如蚪鬚直不卷根穿石罅連蒼蘚昔聞張生十二節蘇子九花今宛宛眼中清氣端可掬此處焉知有塵俗去年贈我小石盆几上團團青一簇知君定出聊自怡此心豈為物所移色空都忘心境寂寥寥獨坐軒中時

水西圖詩

水西絕境江左無何君好事寫作圖良工意匠善盤礴

三峰湧出青芙蓉，古木如龍半天聳。
白雲翩翩欲飛動，桓爨廟前莎草長。
遺民磯下溪流洶，浮圖隱隱林端起。
知是山腰上方寺，高閣五月秋霜寒。
山僧坐閱人間世，竹邊幽徑花叢叢。
濯纓亭古連東峰，賞溪渡口風浪歇。
棹舟之子來相從，我居山中二十載。
披圖一見心目駭，昔來年少今白頭。
山色青青長不改，何君何君爾好竒。
澗阿與爾誅茅茨，卷簾微雨對東郭。
高詠謫仙雲錦詞。

姑蘇臺歌

姑蘇臺上麋鹿游吳江水映西山秋館娃宮樹迥不見
落日荷華今古愁何來豪客增樓櫺醉擁吳姬夜歌舞
齊雲易逐浮雲空鬼火三更照寒雨

憶昔行贈朱伯賢還會稽

憶昔相逢白門道君方壯年我差少同鄉異域心最親
月夕風晨寫懷抱南臺御史能薦才薦才先取文章好
當時結交多俊髦羨君獨得聲名早江城一別三十秋
我出匡徒君宦游甲兵滿地音信斷越雲楚水情悠悠

今春錢塘忽相見君未全衰我猶健探得囊中著述書
松齋曉日開新卷君承明詔入史局我亦奏對延和殿
秋深俱放還舊山兼有賜金并賜燕君家雲巢鑑湖曲
鯖魚膾肥粳稻熟脫巾露頂松石間如鹿如麋不羈束
我歌此曲空復情烈風蕩海鴻宜冥世間富貴自可輕
且學清狂如賀生

阻風行

黃蘆獵獵江浩浩洪濤簸天昏復曉一日行舟兩日留

上水風多下風少未出門時思遠道在路還思在家好
坐看鴻鴈去遙遙却笑人生不如鳥

松雲歌

境公開軒幽澗湄青松白雲相對宜朝看白雲松上起
暮看白雲松下歸松雲無情豈相戀幾度天風吹不散
忽如眠鶴喬松巔又似游龍挂松半月明仙侶下瑤臺
翠葆素車空外來永髯玉貌照山澤停驂弭節相徘徊
有時林間暫分隔松自青青雲自白若人定起閒怡情

倚檻無言山寂寂

墨竹行

平生不識雲心子墨妙通神有如此眼中何處修竹林
湘水邊頭烟雨裏長林蔽虧天為陰鷓鴣啼斷江沉沉
六月南風晝不熱人家住在叢篁深九疑山帶蒼梧野
翩翩帝子雲中下鳳鸞飛舞蚪龍驤羽葆鬢鬢翠堪把
我昔曾行賞溪曲兩岸波光漾寒綠萬玉森森一徑遙
溪口清陰到山麓今朝看圖政自憐畫圖身世俱茫然

雲心骨化丹陽土吁嗟墨妙何人傳

題張孟兼太常白石山房圖

浦江先生張太常白石山下開山房讀書養親不下堂
青山自高溪自長一從攀龍上天闕山中十年春草歇
夜飛清夢到山房堂上雙親已華髮孫卿頗擅丹青好
為寫新圖慰懷抱秋雲半掩草齋寒白鶴不歸松樹老
我見新圖憶舊山石梁垂瀑蘿陰閒金華赤城咫尺間
何日拂衣從此還

墨竹歌

房山高侯愛寫竹一掃生綃數十幅風影翩翩此兩枝
湘君遺珮湘江曲兵戈十年翻地軸零落殘紈如斷玉
晴軒試掛驚老目素壁清飈拂寒綠

魏公文章妙天下世稱善書兼善畫松雪高齋秋氣清
照眼琅玕入模寫一竿秀出何瀟灑美人獨立疎而野
九疑雲老楚江寒翠蓋臨風為誰把

短歌寄魏仲遠

夏蓋湖吞上虞浦魏君家在湖邊住岸花汀草幾春秋
白鳥滄波自朝暮知君愛客仍好奇畫船載酒如溪陂
擢歌中流日將夕壁月湧出青琉璃嗟哉隱居端有道
世上無如閒處好王充遺跡尚可尋賀老風流良不少
去年聽詔來京國識君臉紅頭半白別懷空與水東流
海燕江鴻斷消息今朝聞有東州船尺書欲寄心茫然
福源精舍地最偏安得與君湖上相周旋

溪山圖歌

王侯作畫世無敵下筆直與造化爭神力生綃一幅寫
溪山萬疊烟雲開霽色連峰不斷松杉青石崖噴瀑飛
寒永山中逸客茅作亭桃源路入花冥冥何處溪山有
如此吳山脚插吳溪水放船半出蘆塘灣收綸撥棹誰
家子乃知王侯妙入神縱意所到皆天真右丞糝糊輞
川雪北苑爛漫江南春劉卿平生學岐伯長向吳山采
名藥天子呼來在玉京橘樹間圍舊時宅我識劉卿恨
不早治我沉痾如電掃王侯著意作此圖為我殷勤致

懷抱劉卿重畫輕黃金世人那得知其心江上秋風吹
客襟高歌一曲溪山吟

寄題彩烟山房

天姥峰南彩烟裏梁氏山房屹高峙幽人讀書居其中
萬壑千巖在窻几一從讀書不計春姓名豈肯聞時人
去年應聘來京國今年奉符歸養親梁氏新昌稱巨族
絡谷籠岡架重屋弟兄如林自師友飽飫詩書作梁肉
我聞山房最瀟洒澗水松風入陶寫願學當年支道林

買山終老沃洲下

崧峒外史歌

空同外史清都客
吸景餐霞煉精魄
誤落塵世八千年
回首仙山雲霧隔
自言曾師廣成子
為掌外庭稱外史
記得軒轅問道時
拜跪壇前月如水
大布寬衫著雙屐
千里遨遊如咫尺
曳杖狂歌吳市門
賣藥獨走金陵陌
金陵陌上相識多
水樓月榭隨經過
有時醉卧冶城館
有時靜坐鍾山阿
我識冰顏今十載
夜與燒燈論物外

五更鼻息如雷鳴忘却天地和身世外史去來無定期
出門便不知所之松齋閒寂三日雪待子一笑同掀
眉

賦一曲亭送趙本初待制致仕歸越

鑑湖一曲亭猶在風物千年長不改賀公去後趙公來
山水無情若相待當時季真得賜歸黃冠未必全忘機
爭似今朝玉堂老還鄉仍著宮錦衣鑑湖水闊吞平野
酒船直到亭階下荷華曉日照尊罍楊柳春風拂簷瓦

寄言逸興滄洲客天與斯亭共行樂醉倚闌干撼不醒
夢中細聽鈞天樂

度關隴

隴頭流水關山月月色淒涼水嗚咽今古征人盡斷腸
野客經過亦愁絕連林二月冰不開猛虎一吼蒼崖裂
鸚鵡能言好寄書心事茫茫向誰說

賦梅駙馬清白軒

公家大府臨紫陌行馬當門森畫戟華館香凝錦繡帷

此軒何事名清白軒內琴書清几席軒前池水涵虛碧
退朝歸來白日閒燕坐忘言心自適不似金張許史家
鬪雞走馬相矜誇美人半醉彈琵琶銀燭夜夜燒彤霞
關西昔有楊夫子清白傳家照青史公今富貴當盛年
獨抱遺風有如此山之高分益穹窿水之深兮更清泚
丈夫勛業在青冥豈獨傳家清白耳

題天童萬松圖

小白市太白峰二十里松居其中一徑陰陰翠羽蓋

空竄竄蒼髯龍太白之峰分九隴壯哉千古之佛宮香
雲不動梵唄合樓閣倒影清池空左菴昔年此說法山
谷苔響撞鉅鐘只今九重城裏住夢魂夜夜鄞江東錢
塘有客曰王蒙為君寫此千萬松座間慘慘起陰霧屋
底颭颭生清風何來禪子松下度長衫大笠携一筇亦
有騶從三四公青林路口衣裳紅我初展卷欲大叫海
上湧出高龍從雲端縹緲下玉童有路似與天相通自
憐平生不一到吁嗟老矣將焉從還君此圖袖手坐有

目只送南飛鴻

壽采堂為許克謙賦

舞斑衣進春酒載拜稱觴介眉壽許生心即老萊心老
萊不先生不後進春酒舞斑衣願親高年過期頤堂後
萱花照華髮堦前亦有蘭與芝吳山可融吳水結孝子
娛親心不歇此堂宜與齊門高壽采之名如日月

古村居

古村民古村居古村有田復有廬屋後桑麻四五區屋

前榆柳八九株老婦辟繡兜讀書青燈夜照三更初牛
角帶經耕且鋤年年歲歲輸官租聖人治世如唐虞飽
來擊壤歌康衢烏紗作巾白布襦東隣西舍相招呼醉
歸兀兀杖自扶古村民古村居

題閻立本畫張洪崖像

往年看畫封禺山丹青為我回朱顏今朝看畫江寧郭
頭白眼昏不如昨此圖出自何人手唐相閻公名不朽
人間古畫兵火空此圖必為神所守洪崖先生學仙士

小隱林泉大城市一下蓬萊經幾塵弱水微茫三萬里
神仙道術吾不知洪崖人物何瑰奇天寒掩卷松下坐
白日冉冉西南馳

聽泉軒為藏無盡作

若人有耳唯聽泉泉聲入耳長涓涓穿林出澗度妙曲
萬古不斷冰絲弦此聲不來耳不往中自寂然遺外響
青燈照壁夜沉沉獨倚軒窗月東上

代賦愛蓮歌

我愛蓮花生淨域七寶池中開四色其花朵朵大如輪
來者於斯孕靈質此花不與凡花同晝夜開合吹香風
八功德水恒充溢碧葉旒旒花漿漿我有愛蓮癖夢寐
思見之朝思只在蓮花國莫思不離蓮花池我心但欲
與蓮並不染塵埃自清淨蓮兮蓮兮爾作黃金臺他年
浩歌歸去來

尚睦軒

蔣生作軒名尚睦欲敘彞倫厚風俗一門大小慙怡愉

不在華筵奏絲竹誰謂古來斯道敦兄弟之間難具論
漢謠尺布一斗粟周公管蔡亦流言將生將生慎終始
行見高名照青史天邊有客發長歌澤國秋風鴻鴈裏

周處士哀詩

先生墓木今已拱先生高名尚飛動新城山接富春山
只有祠堂對丘壠我知姓字三十年江城讀傳心茫然
節孝光華照天地青史可書石可鐫口誦法華親壽益
掉頭不受吳人辟請看齊雲百尺樓落日西風卷行迹

西嶺草堂圖為誓上人作

摩雲霄人不復見高風獨為今所羨西嶺東偏舊草堂
七百年來陵谷變有苾芻誓斯受經草堂彷彿圖丹青
靈隱山前天竺後飛來小朵蓮華層草堂住近呼猿洞
怪石嵌空樹高聳三生臺畔秋月涼九曲亭邊春水動
真觀慈雲兩寂寞猿聲夜向峰頭落誓也溪翁白足徒
古人已矣今人作我昔年曾十三四挾書晚出中峰寺
一氣走上蓮花層兩脚跳梁若奔兕于今老大空看圖

江城鴟坐胡為乎人間草堂何處無只有西嶺如西都
清源洞圖為潔上人作

泉南佛國天下少滿城香氣梅檀繞纏頭赤脚半蕃商
大舶高檣多海寶清源古洞尤絕奇花酒仙人顏色好
蛻骨巖連太碧霄晉代青松三四抱高攀南斗不滿尋
下視滄溟纔一沼長年鐘磬度寥寥四月笙歌來擾擾
青厓不雨飛白泉紫澤未春生碧草鶴鳴洞口月蒼蒼
猿挂樹枝風裊裊上方精舍秋葉紅山人不歸蘿屋老

不須惆悵看畫圖去去長歌海天曉

淮之水一首送別

淮之水向東流水流只載行人舟舟行如飛水如射一日可到吳江頭何不載此離情去擲向天涯不知處濠梁有客今白頭望斷孤雲海天暮

和東軒見寄長相思一首

長相思何終極有美人兮淮之側攀援桂枝歌小山盛服我冠好顏色昔年遺我雙龍刀紫錦作褱縣素壁中

夜寒光貫斗牛但恐屋頭飛辟歷朝朝見物不見人欲
往從之脚無力長相思何終極

秋鶯歌

千林入秋露氣清林中尚有黃鶯聲似與羣蟬爭意氣
東林飛過西林鳴向來春風花滿城柳條拂地如長纓
綿綿蠻蠻斷復續千人萬人側耳聽高樓半醉客閣簾
停吹笙白馬貴公子挾彈不敢驚此時胡為不喜聽奈
何節序移人情只合深藏絨繭口亦有妬爾金衣明反

舌無聲良已久伯勞布穀俱潛形秋鷺秋鷺爾能翩然
入幽谷老翁歌詩送爾便覺心和平

全室外集卷四